

同州府志

卷三十三

列女傳

卷三十四

序傳

同州府志卷三十三

列女傳

傳名列女志名士女揚徽彤管劉誥常許泱泱月華
俗質風淳區明懿德宜之斯文述列女傳第二

漢

隨清娛漢太史令司馬遷侍妾也其名不見於漢人紀載
至唐永徽二年同州刺史褚遂良始爲志墓之文蓋其鬼
夜見褚公自陳生平乞一言以傳於世也夫以一憂死女
子冥冥地下一千餘年而不甘湮沒見靈褚公則其生前

之好奇而不同於俗女子者已可概見奇人如司馬公固
宜有奇女子以爲之侍也古今賢才女子姓名不著於故
書雅記俾抱憾九泉血食無所者豈少也哉褚公正人其
言當非荒唐惜長樂亭未指其處後世無復能志其地者
清娛之墓更不可復識矣茲故列諸卷首並全錄褚公之
文以傳之其文曰永徽二年九月余判同州夜靜坐於西
廳若有若無猶夢猶醒見一女子高髻盛妝泣謂余曰妾
漢太史司馬遷之侍妾也趙之平原人姓隨名清娛年十
七事遷因遷周遊名山攜妾於此會遷有事去妾僑居於

同後遷故妾亦憂傷尋故瘞於長樂亭之西天帝閔妾未
盡天年遂司此土代異時移誰爲我知血食何所君亦將
主其地不揣人神之隔乞一言銘墓以垂不朽余感寤銘
之銘曰嗟爾淑女不世之姿事彼君子弗終厥志百千億
年血食於斯

新補傳

楊夫人者漢太史司馬遷女丞相安平侯楊敞之妻也漢
昭帝崩昌邑王賀卽帝位淫亂大將軍霍光與車騎將軍
張安世謀欲廢賀更立帝議已定使大司農田延年報敞
敞驚懼不知所言汗出浹背徒曰唯唯而已延年出更衣

夫人遽從東廂謂敞曰此國之大事今大將軍議已定九卿報君侯君侯不疾應與大將軍同心猶與無決先事誅矣延年從更衣還敞夫人與延年參語許諾請奉大將軍教令共廢昌邑王立宣帝居月餘敞薨益封三千五百戶君子謂敞夫人可謂知事之機者矣

華陰志

桓氏楊賜夫人關內侯太常榮之孫而太常郁之女也桓氏世以經學傳授楊震受業於郁賜復師事郁子而爲郁之婿焉郁子鸞卒夫人歸甯赴哀將至止於傳舍整飾從者而後入鸞子嚴字文林尤修志介心非之及夫人勞問

終無所言號哭而已賜遣吏奉祀因縣發取祀具亦拒不
受後每至京師未嘗舍宿楊氏

華陰志

袁夫人汝陽人司空袁逢女太尉楊彪之妻也子孫有俊
才爲丞相曹操主簿操忌修且以袁術之甥慮爲後患遂
因事殺之命其妻卞氏者遣夫人書并送衣絹車牛夫人
受而亦答之以書書稱彪袁氏章樵曰稱袁氏而加夫名
於上執謙以自卑也

華陰志

任季兒邵陽任延壽妻母兄季宗與延壽爭葬父事延壽
謀其友田建殺季宗建坐死延壽會赦乃以告季兒季兒

日噫今乃語我乎振衣欲去問所與共殺兄者爲誰延壽
曰田建建已死我獨當坐之汝殺我而已季兒曰殺夫不
義事兄之讐亦不義延壽知其義不從已欲以家貨遣之
曰聽汝所之季兒曰我將安之兄死而讐不報事子而子
殺吾兄又何面目而生乎乃告其女曰善視兩弟遂自縊
死馮翊王讓義之令縣表其墓墓在夏陽村祠在莘里村
郃陽志

涼

楊氏呂纂妻右僕射楊桓之女也咸寧五年立爲皇后楊

氏美艷有義烈纂爲超所刺楊氏命禁兵討之殿中皆其
黨與莫有應者將軍魏益多入斬纂首楊氏泣曰人已死
如土石無所復知何忍復殘其形骸乎益多罵之楊氏與
婢數人殯纂於城西將出宮超恐其挾珍寶出外使人搜
索之楊氏厲聲責曰爾兄弟不能和睦手刃相屠我旦夕
死人用金寶何爲超慚而退又問楊氏玉璽所在楊氏怒
曰已毀之矣超見其有色欲納之謂其父桓曰后若自殺
禍及宗卿桓以言告楊氏楊氏曰大人本賣女與氏以圖
富貴一之已甚豈可復使女辱於二氏乎桓不能強遂自

殺諡曰穆后

華陰志

隋

王氏楊慶妻王世充兄之女慶以河間王子爲郇王守滎陽陷於世充世充僭號妻之用爲管州刺史太宗攻洛陽慶謀與歸王氏謝曰鄭以我奉箕箒者綴公之心今負恩負義自爲身謀可若何至長安則公家婢耳願送我還東都慶不聽王謂左右曰唐勝則鄭滅鄭安則吾夫死若是生何益乃飲藥死

華陰志

唐

長孫氏楊遺直妻博通典籍遺直爲濠州錄事參軍客使
姑蘇遺子發假收嚴氏守貧訓子親授諸經四子皆登進
士歷顯官而收至執政

華陰志

王氏在祿而母亡繼母鞠愛父征遼歿繼母又卒氏年十
五乃舉二母柩而立父象招魂以葬廬墓左永徽中詔楊
氏婦在臨時父歿遼西能招魂克葬至祖父母塋隧親扶
板築哀感行路因賜物段并粟以闕表門後適楊紹宗

唐書

楊氏名容華盈川令楊炯姪女善屬文嘗爲新粧詩好事
者多傳之詩曰宿鳥驚眠罷房櫳乘曉開鳳釵金作縷鸞

鏡玉爲臺妝似臨池出人疑向月來自憐終不見欲去復徘徊盈川聞而喜曰吾家道韞也整麗精工齊梁妙詣唐女子無能及者

華陰志

楊氏楊凝女三歲母隴西李氏卒遂依於外族五歲屬母忌日飯僧仁祠就問其故保傳以告乃號泣不食每及是日必皇皇涕慕抱終身之戚焉許嫁河東柳宗元克敦婦儀事姑備敬養之道宗元母嘗曰自吾得新婦增一孝女矣年二十三以疾逝

華陰志

楊氏字德鄰司農少卿楊敬之小女年十三以六韻詩題

奉慈寺自稱關西孔子二十七代孫其警句云日月金輪
動梅檀碧樹秋塔分鴻雁趨鐘掛鳳凰樓事因見勅贈衣
華陰志

姚女定國村人嫂李氏不得於姑每鞭笞輒以身蔽將適
人忽危坐而逝嫂遂慟哭死里中立祠祀焉祠塑女像真
骸包泥中人以簪錐挑之其骨色黃如金

澄城志

宋

侯氏其先太原孟縣人世爲河東大姓曾祖元祖嵩當五
代之亂以武勇聞劉氏偏據日錫土於烏河川以控寇盜

亡其爵位父道濟始以儒學中科第爲潤州丹徒縣令贈
尙書比部員外郎母刁氏封福昌縣君氏行第二幼而聰
悟過人女功之事無所不能好讀書史博知古今父愛之
過於子時以政事問之所言雅合其意常歎曰恨汝非男
子七八歲時教以古詩曰女人不夜出夜出秉明燭自是
日暮則不出房閤母素有風厥之疾多夜作不知人者久
之氏涕泣扶侍常連夕不寢第可世稱名儒才智甚高常
自謂不如氏也年十九歸河南程珦珦官至大中大夫累
永年縣開國伯氏得封上谷郡君子顯學者稱明道先生

顧稱伊川先生當時爲洛學之宗也

郃陽志

金

師氏雷庄人適雷某年二十四夫亡無子誓不再嫁篤養舅姑姑病革潛割臂肉雜飲食以進病尋瘥後舅姑俱逝其兄師達利其產私許楊珍婚氏知而不從媒妁證氏親受楊幣官判氏歸楊氏無以自明投庭井死提刑司上其事特旌貞潔

郃陽志

元

李氏華陰大員里李克忠之女年十八適王太守子懋德

未踰年而懋德卒人以其少艾爭娶李氏剪髮誓不改適
至正末兵亂李氏育猶子爲己子乃攜走華山張超谷避
難兵息仍歸故里人皆奇其節行洪武十六年有司以聞
旌表其門方孝孺贊之其畧曰李節婦未踰年而夫卒撫
夫之猶子以續其宗非篤於仁義者能之乎嗚呼人之美
惡不係于世變也久矣

華陰志

明

翰林程濟妻某氏濟爲岳池教諭以榮惑守心將疏論之
氏諫曰天道渺茫未可盡信奈何越職言事濟不聽逮繫

廷訊隨至京後金川門破濟從亡氏自縊死

朝邑志

屈氏名淑都御史屈直之仲女也生而聰慧十餘歲父課諸兒讀經史淑刺繡其旁竊聽背誦通曉義意於是博覽羣書并嫺吟詠歸朝邑韓邦靖汝慶汝慶髫年以神童名弱冠舉進士與氏稱雙璧詩文倡和如良友焉汝慶官參政早卒氏後十四年而歿無子有女曰異痛其父母繼亡父集旣梓而母詩不傳以書貽武功修撰康海之女乞海爲母詩序其詞酸楚有願藉皮爲楮削骨代穎以傳母集之語海感而爲之序

朝邑志

張烈女西莊張世強女字市民魏珠萬歷八年珠死女年
十六衣縞不食誓以死殉母氏百端誘之曰珠貧兒也旣
無緣早世它日擇婿更適富人不猶愈於徒死邪女曰以
一女子事兩人乎卒不食家人慮自裁防護甚嚴女乃佯
飲食如故居二日紿其父母曰我已甘食母以我故謾因
作又以履遺珠母乘間自經三日昇至魏門其面如生

邑志

朝

雷世濟妻韓氏恭簡公女夫以子士楨爲諸生不肯應保
長爲署官張銘杖死氏與士楨屢控臺司銘進士降官主